

Ra Fukheiq



□ Lingz Siuyangh / 凌秀香

Gaxgonq miz boux sai ndeu, coh de heuhguh Daegsae. Ciuuh goeng ciuh boh Daegsae dwg bouxmiz, hoeng, daengz ciuh Daegsae couh hoj lo. De ndaem maz mbouj baenz maz, ciengx maz mbouj ndaej maz, saedceij hoj lai raeuh. Vahgeq naeuz fouqmiz mbouj gvaq sam daih, caen dwg dahraix bw.

Daegsae 8 bi dai meh, 10 bi dai boh, baenz boux lwggyax ndeu. De 30 bi le, lij caengz aeu ndaej yah. Gyoengq doengzdoi de gaenq baenz-ranz miz lwgnyez lo, cij miz de haeujok cungj dwg bouxdog ndwi. Aen ranz de youq lijdwg ranz namh, aenvih nanz mbouj ndaej coih, aen ranz youh rwix youh cumx. De yawj gij ndwen-ngoenz cihgeij gag youq ndawsim danqheiq naeuz: Gou caen siliengz, mbouj miz saekdi fukheiq lawz!

Miz ngoenz ndeu, Daegsae byaij daengz gyaеujmbanj, raen boux dahsau nomjoiq caemhcai q gyaеundei he, hoeng de damengz. Daegsae byaij gvaqbae cam de: “Mwngz naeuz fukheiq dwg maz?” Dahsau neix dap naeuz: “Ciuhvunz gou cungj dwg youq ndawlaep, doi q gou daeuj gangj, da gou yawj ndaej raen doxgai q, neix couh dwg fukheiq ci q hung gou lo.” Daegsae ngaekngaek gyaеuj, byaij deuz lo.

De byaij ok mbanj bae, raen gyangdoengh miz gofaexdauz ndeu, de byaij gyawj cam gofaexdauz: “Mwngz naeuz fukheiq dwg maz? Gofaexdauz dap naeuz: “Ndaw namh laj goek gou miz goenj rin hung ndeu, dangj gij rag gou, rag gou mbouj ndaej cwxcaih iet, gutgungq baenz gaemz dog, mbouj ndaej supsou gij yingzyangj lai, loengh dwk gou cij rox hai va, mbouj rox gietmak. Danghnaeuz gou rox hai va youh ndaej gietmak, gou couh roxnyinh gou miz fukheiq lo.” Daegsae dingqnyi gofaexdauz baenzneix gangj, hix mbouj gangj maz, youh byaij deuz lo.

Daegsae byaij hwnj bya bae, raen dingjbya miz duz nuem hung ndeu, de gvaqbae cam duznuem: “Mwngz naeuz fukheiq dwg maz?” Duznuem neix dap naeuz: “Gou youq gwnz bya neix mulienh cibgeij bi lo, lij caengz lienh baenz duzlungz. Baenzlai bi daeuj, gou mbouj gwn gvaq boux vunz he, hix mbouj sienghah gvaq doenghduz he. Hozhawq le gou couh gwnz raemxraiz,

dungxiek le gou couh gwn nywjnyaj. Danghnaeuz gou ndaej bienqbaenz duzlungz, gou couh dwg miz fukheiq lo, daengz seizhaenx gou couh haiz ok naed cawbauj ndaw dungx gou gung hawj vunz lai.” Daegsae lumj dingq ndaej rox nei lizbae lo.

Daegsae maranz le gag naemj: Gij fukheiq caezgya cungj mbouj miz byawz doxdoengz, maz doi q gou daeuj gangj dwg fukheiq ne? O, gou rox lo. Danghnaeuz gou miz ranz, miz yah, ndaem maz ndaej maz caemhcai q ciengx maz baenz maz, gou hix dwg boux miz fukheiq ndeu. Baenzneix siengj le, de gietdingh okbae ra fukheiq.

Daegsae bae lwnh hawj goeng ci q laux ndaw mbanj, naeuz de yaek okrog bae ra fukheiq. Goenglaux dingq le daej mbouj dwg riu hix mbouj dwg, naihsim dwk naeuz Daegsae: “Fukheiq mbouj dwg ra ndaej nw! Fukheiq dwg guh okdaeuj ne!” Daegsae geizheih dwk cam Goenglaux: “Fukheiq dwg guh okdaeuj? Baenzlawz guh?” Goenglaux dap naeuz: “Lai guh saehndei, fukheiq couh gag daeuj lo.” Daegsae dingq le moengjmoengj doengjdoengj, vihmaz lai guh saehndei couh miz fukheiq ne?

Hoeng de lijdwg dingq gij vah Goenglaux. Daj seizhaenx hwnj, ndaw mbanj miz hoengzsaeh begsaeh, Daegsae cungj bae bangfwngz; miz vunz guh ranz, de couh bae bang hong; mwh ndaem mwh sou, de couh bae cae uq vunzmbanj caemh guh. Sam bi gvaqbae lo, saedceij Daegsae lij lumj yiengh gae uq nei. De youh bae cam Goenglaux: “Goenglaux ha Goenglaux, saehndei gou guh gvaq haujlai lo, hoeng, fukheiq vihmaz lij caengz daeuj ni?” Goenglaux riu “ho ho”

naeuz: “Mwngz guh saehndei cungj siengj aeu bauqdap, neix mbouj dwg caensim caen’ei q bae guh saehndei bw! Baenzneix fukheiq mbouj rox daeuj.” Daegsae dingq le miz di najmong lo.

Ngoenz ndeu, Daegsae hwnj bya bae ra duznuem, doi q de naeuz: “Duznuem ha, naed cawbauj ndaw dungx mwngz ce youq ndaw dungx hix mbouj miz yungh, mbouj yawx haiz okdaeuj ba, raeuz dawz bae gai aeu ngaenz, dawz ngaenz daeuj vih vunzmbanj guh di saehndei, lumjnaeuz coih roen, guh giuz, mbwt cingjraemx, daengj hag dangz daengjdaengj, baenz lwi?” Duznuem neix ngeixngeix, roxnyinh Daegsae gangj ndaej deng, couh haiz naed cawbauj ndaw dungx de ok bak lo.

Naed cawbauj neix caen dijbauj dahraix, gai ndaej haujlai ngaenz. Daegsae dawz gij ngaenz gai ndaej guh gij saeh de gaxgonq coh duznuem dwen daengz, vih vunzmbanj coih roen, guh giuz, daengj hag dangz, lij youq gyang mbanj mbwt aen cingjraemx ndeu. Daj seizhaenx hwnj, gyoengq vunzmbanj ok mbanj couh miz roen, mbouj aeu byaij roen-saejgae q lo, gvaq dah mbouj aeu vaijraemx lo; lwgnyez ndaw mbanj youq henz ranz couh ndaej doegsaw, mbouj aeu hwnq rongh bin bya byaij gyaе bae hag dangz; vunzmbanj mbouj aeu bae gizgyae rap raemx daeuj gwn lo.

Gyoengq vunzmbanj cae uq mbanjnden cungj haenh Daegsae simndei, caemhcai q docih de raixcaix. Caezgya lij naeuz: “Vunzndei mbwn hoh.”

Caiqnaeuz, duz nuem hung haenx baez haiz ok naed cawbauj ndaw

dungx le, mbouj geij nanz, de couh bienqbaenz duzlungz lo, mbin hwnj gwnz mbwn bae lo.

Ngoenz ndeu, Daegsae fwd siengj daengz gofaexdauz rox hai va mbouj rox giet mak. De dawz gvak bae mbwt goenj rin hung laj goek dangj rag haenx, mbwt le sam ngoenz sam hwnz cij dawz goenj rin hung okdaeuj. Daegsae dawz namh cae uq aeu bwnh bae moek goemq dauq, lij rwed raemx hawj gofaexdauz dem. Bihaenx gofaexdauz ndaej gietmak lo, caemhcai q lij bienqbaenz go faex sien ndeu.

Daegsae dingq vunz naeuz miz boux canghyw ndeu, rox yw damengz, de ok ngaenz bae cingj canghyw daeuj yw dahsau damengz gyaеujmbanj de bungz. Canghyw yawj gvaq fouq da dahsau le, hai ywdoj hawj de. Daegsae ngoenzngoenz bae bang dahsau damengz baek yw, dahsau gwn 49 ngoenz yw le, da de caen yawj ndaej raen doxgai q dahraix, de angq dwk mbouj miz maz beij ndaej hwnj. Youq gij ngoenz cae uq Daegsae doxyouq, de deng gij simndei Daegsae dajdoengh, doeklaeng de couh haq hawj Daegsae guh yah lo.

Gwn raemx mbouj lumz boux mbwt mboq. Duznuem ndaej bienqbaenz duzlungz le couh soengq aen ranz moq ndeu hawj Daegsae, godauzsien soengq cwz cae uq vaiz hawj Daegsae. Dahsau haenx cae uq Daegsae caemh gvaq ndwenngoenz, songde ndaem maz ndaej maz, ciengx maz baenz maz. Daegsae yawj gij saedceij cihgeij, ndawsim diemzsubsub, de gag daengq: Lai guh saehndei, laebdaeb guh roengzbae, lij aeu ciuhlaeng cienzswnj roengzbae, baenzneix fukheiq gag rox ra daeuj bw!

